



Kamis, 14 Maret 2024

Ogen: Bilangan 10: 29-30



Turang Hobab



Hobab e me silih Musa, turang Sipora, anak Jetro. Janah Hobab ngenca anakna dilaki. I bas Keluaren 18 isingetken maka Hobab ikut ras bapana, maba Sipora ras duana anakna njumpai Musa. Tupung e Musa mimpin bangsa Israel si mbaru denga ndarat i bas Mesir nari. Paksa e bangsa Israel sangana erkemah i teruh deleng Sinai. E maka asum bangsa Israel berkat i deleng Sinai nari ku taneh Kanaan, ipindo Musa man silihna gelah ikut ras ia radu ras bangsa e ku taneh Kanaan. Sabap Tuhan nehken padanNa man Musa ras man bangsa e me ngaloken kiniulin Tuhan. Musa pe ngarap segelah Hobab silihna pe ikut ras ngeraskensa kiniulin Tuhan e.

Tapi Hobab erpenulak janah nina man silihna Musa maka madin ia mulih saja. Tetap nge iajuk Musa silihna e janah erpengarapen kal ia maka Hobab banci ikut ras ia. Sebab Musa pe erpengaku maka Hobab ngenca si banci nuduhken dalam i bas taneh si mesawang e. Mungkin Hobab sekalak pengembara si nggo megati niar-niari taneh sekitar deleng Sinai seh ku deher taneh Kanaan khususna taneh-tanah si mesawang.

E maka Musa pe ngatakensa man Hobab maka pasu-pasu Tuhan man ia ras bangsa Israel pe iberekenna sada bagin man Hobab. La lit isurtakeni bas Pustaka uga kedungenna, surung entah lahang Hobab ikut ras Musa. Saja, tersinget i bas Hakim-hakim 1: 6 maka sinursur mama Musa e me kalak Keni ikut i bas rombongan bangsa Israel. Teridah keleng ate Musa nandangi jabuna termasuk mamana ras silihna. Musa erpenggurun man mamana kerna mimpin sada bangsa bage pe keleng atena silihna maka iajukna gelah ikut ras ia guna ngenanami pasu-pasu Tuhan e. Kalak si ndalanken si ngena ate Tuhan nggo sepatutna mediate ras engkelengi kalak sideban kusus ibas jabuna.